

# La regenza deplorascha la decisiun

Il na al project da Gieus olimpics d'enviern 2022 en il chantun Grischun è ina trumpada

■ (anr/hh) La regenza grischuna deplorascha il na dal suveran al project per Gieus olimpics d'enviern l'onn 2022 en il chantun Grischun. Ella spera dentant che la discussiun occurrada en vista a la votaziun possa dar anim per projects futurs.

La dumengia s'enter mezdi ha la regenza cumpletta dà pled e fatg a Cuira areguard il na dal pievel al project da gieus olimpics. «La regenza deplorascha la fin dal project. Ussa vali da preparar il chantun per l'avegnir senza il schlantsch d'ina candidatura per ils gieus olimpics. La regenza spera ch'il chantun muntagnard possa profitar per ses ulteriur svilup da la viva discussiun ch'è vegnida iniziada las ultimas emnas. Tut las forzas en il chantun èn supplitgadas da collavurar», accentuescha il president da la regenza, Hansjörg Trachsel. A San Murezzan e Tavau è la maiortad da la populaziun s'exprimida a favur d'ina candidatura per ils gieus olimpics. Il resultat chantunal è percenter stà negativ, quai che la regenza deplorascha. «Grazia al project 'Olimpia 2022' èsi tuttina gartegià da lantschar ina discussiun davart il futur da noss chantun. Da questa dinamica stuess il Grischun profitar per dumagnar las sfidas pretensiusas dal futur», di cusseglier guvernativ Hansjörg Trachsel, schef dal departament d'economia publica e fatgs socials.

## Salvar ils interess

En connex cun sia posiziun areguard la votaziun ha la regenza era gist preschentà intgins puncts decisivs per l'avegnir. Tranter auter menziuna ella ils projects da traffic dal Grischun. Quels sa chattan anc adina en ina situaziun da concorrenza cun ils projects da las grondas aglomeraziuns. L'impurtanza per l'economia publica dals projects grischuns è – cumpareglià cun il rest da la Svizra – relativamain pitschna. Perquai èn las schanzas ch'ils projects pla-



La regenza grischuna deplorascha la decisiun dal pievel concernent il projects dals Gieus olimpics d'enviern 2022 en il chantun Grischun.

FOTOS H. HUONDER

nisads vegnian realisads anc intschertas. Medemamein vul ella s'engaschar sin il sector dal sport. Stabiliments da sport pon vegnir promovids en il rom dal concept per implants da sport d'impurtanza naziunala, respectivamain chantunala. Actual èn il mument il project davart in center da prestaziun per unihockey a Cuira sco er l'idea dad in center naziunal per il sport d'enviern en il Grischun.

## Credit per candidatura scroda

Cun il na dal suveran scroda er il credit d'impegn dad otg milliuns francs ch'il cussegl grond aveva deliberà. El è vegnì concedì unicamain per finanziar la part chantunala da la candidatura per ils Gieus olimpics d'enviern 2022. «Las reservas en l'auttezza da 300 milliuns francs na vegnan betg furmadadas. L'agen chapital da circa ina milliarda francs resta pia disponibil», punctuescha la regenza. La regenza persista che l'agen chapital na duaja betg vegnir duvrà per finanziar custs currents, mabain

oravant tut per realisar infrastructures necessarias. Sin basa d'ina incumbensa ch'è vegnida acceptada la sessiun d'october 2012 dal cussegl grond vegn la regenza ad elavurar ina strategia concernent il svilup dals territoris da muntogna. «La strategia vegn a sa basar sin il project da la confederaziun che examinescha quest svilup en il rom da la missiva concernent la promozion dal lieu 2016–2019. En quest connex goga er l'iniziativa cunter las abitaziuns secundaras ina rolla», scriva la regenza.

## Refurma dal turissem

Accents vul la regenza er dar sin il sector dal turissem. La refurma dal turissem cun la finamira da crear destinaziuns vegn terminada per gronda part per la fin da l'onn. La basa per in program successur, il program da turissem 2014–2021, vegn elavurada actualmain. La direenziun principala è quella d'augmentar la competitividad internaziunala e da megliarar la valurizaziun dals purtaders da prestaziun. «Betg mo per

la branscha turistica, mabain per il Grischun sco lieu economic ston las cundiziuns generalas vegnir meglieradas», accentuescha la regenza. Ultra da quai pon tenor la regenza vegnir sustegnids projects singuls che han in effect tant per las regiuns sco er per tut il chantun sco per exempel la realisaziun dal Campiunadi mundial da skis 2017, l'elavuraziun dals martgads da la Brasilia, da l'India e da la China u er il project «Tschima – Kulturelle Intervention am Berg» da la gruppa Arena Alva.

## Lavur da l'uniun va a fin

L'uniun «XXIV. Gieus olimpics d'enviern Grischun 2022» vegn a terminar sia lavur e preparar il quint final. Tenor la cunvegna tranter ils partenaris participads surpiglian la confederaziun, Swiss olympic ed il chantun ensemen cun las vischiancas da San Murezzan e da Tavau mintgamai in terz da las expensas budgetadas da 5,4 milliuns francs. La contribuziun chantunala garantida da la regenza importa 900 000 francs.